

## ԱՄՆ-Իսրայել-Իրան պատերազմի հետևանքները Հարավային Կովկասի համար

### ԱՊՐԻ Արմենիայի վերլուծություն

2026թ-ի մարտի 16-ի դրությամբ

2026թ-ի փետրվարի 28-ին Իսրայելի վարչապետ Բենյամին Նեթանյահուն և ԱՄՆ նախագահ Դոնալդ Թրամփը հայտարարեցին Իրանի դեմ ռազմական գործողությունների մեկնարկի մասին, որոնք համապատասխանաբար ստացան «[Մոնչազող առյուծ](#)» (Roaring Lion) և «[Էպիկական կատաղություն](#)» (Epic Fury) անվանումները: Ի պատասխան՝ Թեհրանը սկսեց «[Ճշմարիտ խոստում-4](#)» գործողությունը: Այս նոր հակամարտությունն իր տևողությամբ և մասշտաբներով արդեն գերազանցել է 2025թ-ի հունիսի 12-օրյա պատերազմը:

Թեև Հարավային Կովկասը հաճախ անտեսվում է, և փորձագիտական ու քաղաքական վերլուծությունները հիմնականում կենտրոնանում են Մերձավոր Արևելքի վրա ունեցած ազդեցության վրա, պատերազմի դիտարկման համատեքստում Հարավային Կովկասի նշանակությունն, այդուհանդերձ, էական է: Տարածաշրջանը փորձության է ենթարկում ԱՄՆ-ի և Իրանի ուժի պրոյեկտման կարողությունները, այն նաև կարող է ծառայել որպես փախստականների հնարավոր անցակետ և գտնվում է մի քանի հաղորդակցության ուղիների նախագծերի կենտրոնում, որոնք կարող են վերափոխել համաշխարհային մատակարարման շղթաները:

ԱՊՐԻ Արմենիայի այս վերլուծությունն ուսումնասիրում է պատերազմից բխող ռիսկերն ու հնարավորությունները թե՛ Հայաստանի, թե՛ Հարավային Կովկասի համար և առաջարկում է դրանց հասցեագրման ուղիներ.

- Պատերազմն ընդգծում է տարածաշրջանային ուղիներն ու սահմաններն ապաշրջափակելու հնարավորությունների պատուհանի թե՛ փխրունությունը, թե՛ կարևորությունը:

- Իրանի տարածքում մարդասիրական օգնության տրամադրումը պետք է առաջնահերթություն լինի Հայաստանի և Հարավային Կովկասի մյուս երկրների համար՝ տարածաշրջանային անկայունության ռիսկերը մեղմելու նպատակով:
- Աննախադեպ հնարավորություն է ստեղծվել՝ ընդհանուր եզրերի և շահերի հիման վրա տարածաշրջանային մակարդակով փոխգործակցության համար:

## ԻՆՉ Է ՆՇԱՆԱԿՈՒՄ ԱՅՍ ՊԱՏԵՐԱԶՄԸ ՀԱՅԱՍՏԱՆԻ ՀԱՄԱՐ

### Անվտանգություն

Այսօր Հայաստանն Իրանի հարևան երկրներից միակն է, որը հարվածների թիրախ չի դարձել: Հայաստանի տարածքում անվտանգության ոլորտի միջադեպերի առաջացման հավանականությունը, ինչպիսիք են Թուրքիայի ուղղությամբ արձակած իրանական հրթիռների որսումը Հայաստանի օդային տարածքում կամ Նախիջևանի օդանավակայանին ԱԹՄ-ների հարվածները, մնում է ցածր:

Միջնաժամկետ և երկարաժամկետ հեռանկարում անվտանգության ոլորտում մտահոգության միակ հնարավոր առարկան Հայաստանի և Միացյալ Նահանգների համատեղ նախագծերն են, որոնք Իրանը կարող է ընկալել որպես «երկակի նշանակության ենթակառուցվածքներ»: Դրանց թվում են Հրազդանում կառուցվելիք արհեստական բանականության (ԱԲ) տվյալների մշակման կենտրոնը (նմանատիպ օբյեկտներ [թիրախավորվել](#) են արաբական երկրներում), կամ «Թրամփի ուղի՝ հանուն միջազգային խաղաղության և բարգավաճման» նախագծի (TRIPP) գործունեության շրջանակներում Իրանի հետ սահմանին ամերիկյան ցանկացած տեսակի ներկայությունը: Եթե Վաշինգտոնի գազաթնաժողովից մի քանի ամիս անց Իրանի [երկակի արձագանքը](#) վկայում էր TRIPP նախագծի որոշ ասպեկտների՝ հատկապես երկաթուղային երթուղու նկատմամբ կառուցողական վերաբերմունքի մասին, ապա պատերազմն ուժեղացրեց Իրանի թերահավատ դիրքորոշումն այս հարցում:

Երկարաժամկետ հեռանկարում Իրանի կենտրոնական ղեկավարության անկայունությունը կարող է լոգիստիկ և քաղաքական խնդիրներ ստեղծել Երևանի համար հարավի շուկաներից,

օրինակ՝ Հնդկաստանից գենքի մատակարարման հարցում, թեև գոյություն ունեն այլ՝ ավելի բարդ այլընտրանքներ:

## Տնտեսություն

Ներկա պահին պատերազմի տնտեսական ազդեցությունը երկկողմ տնտեսական համագործակցության վրա, ինչպիսիք են առևտուրը և էներգետիկ գործարքները, թվում է նվազագույն, մինչդեռ առավել մտահոգիչ խնդիր են հանդիսանում Հայաստանի համար հարավի շուկաների հասանելիության խոչընդոտները:

Չնայած Երևանի և Թեհրանի միջև առևտրաշրջանառության շարունակական աճին՝ 2025թ-ին Իրանի բաժինը կազմել է 768 մլն. ԱՄՆ դոլար կամ Հայաստանի ընդհանուր առևտրաշրջանառության 3,6%-ը, ինչը կրիտիկական ցուցանիշ չէ: Սակայն Իրանից Հայաստանի կախվածությունը որոշ ապրանքների մասով, ինչպիսիք են բիտումը, կավիճը և ցեմենտը, բավականին բարձր է, իսկ ներմուծման այլընտրանքային աղբյուրներն ավելի թանկ են: Իրանական մատակարարումների երթուղիների հետ կապված երկարաժամկետ խափանումները կարող են հանգեցնել Հայաստանում գնաճին: Համեստ երկկողմ առևտրային կապերի շրջանակներից դուրս Հայաստանի արտաքին առևտրի ավելի քան 20%-ն անցնում է Իրանի տարածքով: ՀՀ վիճակագրական կոմիտեի տվյալներով Հայաստանը Մերձավոր Արևելք է արտահանում ծխախոտ և անասուններ, իսկ հիմնականում Չինաստանից ներմուծում է խաղալիքներ, տեքստիլ, թուղթ և կահույք: Այդ հոսանքներն իրականացվում են Իրանի տարածքով: Իրանի միջոցով Մերձավոր Արևելք արտահանումը կարող է վերառուղորդվել Վրաստանի և Թուրքիայի տարածքով՝ առանց տրանսպորտային ծախսերի էական ավելացման, իսկ Չինաստանից ներմուծումը կարող է մասամբ վերառուղորդվել Վրաստանի տարածքով և մասամբ փոխարինվել այլ երկրներից ներմուծմամբ: Անկախ Իրանում տեղի ունեցող զարգացումներից՝ այդ երկիրը կարիք է ունենալու Հայաստանից էլեկտրաէներգիայի մատակարարման՝ «գազ էլեկտրաէներգիայի դիմաց» համաձայնագրի շրջանակներում (Հայաստանն օգտագործում է Իրանի մատակարարած գազը էլեկտրաէներգիա արտադրելու համար, որն էլ իր հերթին ուղղվում է ինչպես Իրան, այնպես էլ ներքին շուկա): Իրանի գազի արդյունահանման ենթակառուցվածքի վատթարացումը կարող է հանգեցնել գազի մատակարարումների խափանումների՝ նվազեցնելով երկու երկրների միջև ընդհանուր ապրանքաշրջանառությունը: Դա նաև մատակարարումների ոլորտում բացասական շոկի կենթարկի Հայաստանի տնտեսությունը: Կարճաժամկետ հեռանկարում

իրանական գազի մատակարարումների ամբողջական դադարեցումը կհանգեցնի գազի և էլեկտրաէներգիայի գնի բարձրացմանը: Մակայն հետևանքները պայմանավորված կլինեն գազամատակարարման խափանումների ծավալով և այլընտրանքային էներգետիկ շուկաներ անցնելու Հայաստանի կարողության արագությամբ:

Իրանում պատերազմի պատճառով զբոսաշրջության անկումը նույնպես կարող է ազդել Հայաստանի տնտեսության վրա: 2025թ-ին զբոսաշրջային հոսքի ծավալով երրորդ տեղում գտնվող և Հայաստանի ընդհանուր զբոսաշրջիկների [8% կազմող](#) իրանցի զբոսաշրջիկների, ինչպես նաև Իրանի տարածքով Հայաստան եկող այլ երկրների զբոսաշրջիկների ներհոսքի նվազումը խոչընդոտ կդառնա ՀՀ տնտեսական աճի համար:

## Մարդասիրական հարթություն

Պատերազմը կարող է հանգեցնել Իրանից դեպի Հայաստան փախստականների ներհոսքի, թեև դա կախված է Իրանի պետական ապարատի գործունակությունից և երկարաժամկետ հեռանկարում ներքին կայունությունից: Եթե պատերազմի ավարտին իրանական կառույցները դադարեն գործել, դա կհանգեցնի փախստականների զանգվածային տեղաշարժի, ինչը զգալի ճնշման կենթարկի տարածաշրջանի սոցիալական ապահովության և առողջապահական համակարգերը:

Հայաստանը վերջերս բախվել է փախստականների և տեղահանվածների մի քանի ալիքի՝ 2020թ-ին (Լեռնային Ղարաբաղից՝ երկրորդ պատերազմից հետո և Լիբանանից՝ Բեյրութի նավահանգստում տեղի ունեցած պայթյունից հետո), 2022թ-ին (Ռուսաստանից՝ Ուկրաինայի դեմ ռազմական գործողությունների մեկնարկից հետո) և 2023թ-ին (Լեռնային Ղարաբաղի հայերի էթնիկ զտումից հետո): Յուրաքանչյուր անգամ փախստականներին ընդունելու համակարգի հնարավորությունները ենթարկվել են փորձության, և կառավարությունն ու հասարակությունը հարմարվել են՝ մեծ մասամբ դիվանագիտական գործընկերների աջակցությամբ: Չնայած որոշ ռուսաստանցիների հեռանալուն՝ սոցիալական ենթակառուցվածքի առումով Հայաստանի հնարավորությունները, ամենայն հավանականությամբ, սահմանափակ են:

Համեմատաբար փոքր թվով (նույնիսկ տասնյակ հազարավոր) իրանաբնակ ադրբեջանցի փախստականների մուտքը Հայաստան կարող է լարվածություն առաջացնել նրանց և տեղի հայ բնակչության միջև, ինչը Բաքուն կարող է օգտագործել որպես ճնշման միջոց Հայաստանի վրա: Իրանի քաղաքական համակարգի փոփոխության դեպքում հնարավոր է նաև Իսլամական հանրապետության անվտանգության ապարատի հետապնդումներից փախչող միջին և ստորին օղակների ներկայացուցիչների ներհոսք:

Դեպի Հայաստան փախստականների ներհոսքի հավանականությունը ներկայումս մեծ չէ և կշարունակի այդպիսին մնալ քանի դեռ պահպանվում է Իրանի պետական ապարատի համեմատական կայունությունը: Սակայն այդ ռիսկը կարող է կրկին առաջանալ, եթե Իրանի, Իսրայելի և ԱՄՆ-ի միջև ռազմական գործողությունները շարունակվեն միջնաժամկետ հեռանկարում: Այլ կերպ ասած, քաղաքականության տեսանկյունից անհրաժեշտ են մարդասիրական օգնություն տրամադրելու պատրաստականությունը և հասարակության տոկոսությունը:

## Ի՞նչ է պետք անել

Հաշվի առնելով նոր պատերազմի մասշտաբների և բնույթի առանձնահատկությունները՝ Հայաստանի կառավարությունը ցանկալի է.

- **Ստեղծի միջգերատեսչական աշխատանքային խումբ:** Հավանական է, որ Իրանի և Իսրայելի միջև ռազմական գործողությունները կվերսկսեն նույնիսկ ներկա փուլի ավարտից հետո: Հնարավոր ապագա ռազմական գործողություններին պատրաստ լինելու համար խորհուրդ է տրվում Հայաստանի կառավարությանը կազմել աշխատանքային խումբ Իրանի շուրջ ստեղծված իրավիճակը վերլուծելու համար՝ ներգրավելով Արտաքին գործերի նախարարության, Պաշտպանության նախարարության, Ազգային անվտանգության ծառայության, Արտաքին հետախուզության ծառայության, Ֆինանսների նախարարության և Էկոնոմիկայի նախարարության ներկայացուցիչներին:
- **Ուժեղացնի անվտանգությունը՝ Ադրբեջանի, Նախիջևանի Ինքնավար Հանրապետության և Իրանի հետ Սյունիքի սահմաններով:** Հաշվի առնելով Հայաստանի հարավային շրջանի անվտանգային փխրուն վիճակը՝ մենք խորհուրդ ենք տալիս

Սյունիքում պաշտպանական միջոցները, հատկապես ՀՕՊ զորքերը, պահել բարձր մարտական պատրաստվածության վիճակում և մշակել հետագա ծրագրեր՝ ճգնաժամային իրավիճակներում տարածաշրջանի դիմակայունությունն ապահովելու համար:

- **Նվազեցնել TRIPP-ի, ԱԲ տվյալների կենտրոնի և ամերիկյան ընկերությունների ներգրավմամբ այլ նախագծերի հետ կապված ռիսկերը՝** իրանցի գործընկերների հետ ակտիվ շփումների միջոցով և նրանց այդ նախագծերի բովանդակությանը ծանոթացնելով՝ հնարավոր թյուրիմացություններից խուսափելու համար: Ռիսկերը պետք է նվազեցվեն նաև երաշխավորելով, որ ԱՄՆ-ի հետ որևէ կերպ առնչություն ունեցող անվտանգային ընկերություններ կամ անձնակազմ ներկա չեն լինի Իրանի սահմանի անմիջական մերձակայքում՝ հաշվի առնելով թե՛ այդ անձնակազմի անվտանգությունը, թե՛ TRIPP նախագծի նպատակները:
- **Իրականացնի մարդասիրական նախաձեռնություն հենց Իրանում:** Հայաստանի կառավարությունը կարող է մարդասիրական նախաձեռնությամբ հանդես գալ՝ Իրանի հարևան շրջանների բնակչությանը պարենային, բժշկական և այլ տեսակի օգնություն ցուցաբերելով: Սահմանից այն կողմ օգնության տրամադրումը կօգնի իրանական հասարակությանն ավելի արագ վերականգնվել ճգնաժամից հետո, կցուցադրի Հայաստանի բարի կամքը ադրբեջանական ծագում ունեցող Իրանի քաղաքացիների նկատմամբ՝ նվազեցնելով հնարավոր հակահայկական տրամադրությունները և փախստականների հնարավոր հոսքը դեպի Հայաստան:
- **Դիտարկի Աբովյանի ստորգետնյա գազապահեստարանի և նավթամթերքի պահեստարանների ընդլայնման հնարավորությունը՝ Հայաստանի էներգետիկ անվտանգությունն ու դիմակայունությունն ամրապնդելու համար:** Համաշխարհային և տարածաշրջանային էներգետիկ շուկաները, ամենայն հավանականությամբ, կմնան տատանողական: Թեև Ռուսաստանի հետ էներգետիկ համաձայնագիրը սկզբունքորեն ուժի մեջ է մինչև 2043 թվականը, նավթի և գազի պաշարների ավելի մեծ ծավալը կօգնի բարձրացնել Հայաստանի էներգետիկ անվտանգությունը մատակարարումների լուրջ խափանումների և գնային տատանումների պարագայում:

## Ի՞ՆՉ Է ՆՇԱՆԱԿՈՒՄ ԱՅՍ ՊԱՏԵՐԱԶՍԸ ՏԱՐԱԾԱՇՐՋԱՆԻ ՀԱՄԱՐ...

### ... երբ խոսքը տարածաշրջանային կայունության մասին է

2025 թվականի օգոստոսին տեղի ունեցած Վաշինգտոնի գազաթնաժողովը [աննախադեպ առիթ](#) էր Հայաստանի և Ադրբեջանի միջև խաղաղության ինստիտուցիոնալացման, ինչպես նաև Թուրքիայի և Հայաստանի միջև հարաբերությունների կարգավորման համար: Սակայն Բաքվի և Անկարայի անգործության պատճառով այդ առիթը դեռ չի օգտագործվել, ինչը հանգեցրել է «ոչ խաղաղություն, ոչ պատերազմ» անորոշ վիճակում գտնվող տարածաշրջանային իրողության:

Իրանում շարունակվող պատերազմն ընդգծում է Հարավային Կովկասում տևական կայունության և անվտանգության անհրաժեշտությունը՝ որպես տարածաշրջանի դիմակայունության և բարգավաճման կարևոր բաղադրիչ: Մինչ երկու պատերազմները շարունակում են մոլեգնել տարածաշրջանի հյուսիսում (Ուկրաինա) և հարավում (Իրան)՝ բավականին անկանխատեսելի հետևանքներով, առկա «ո՛չ խաղաղություն, ո՛չ պատերազմ» իրավիճակի պահպանումը Հարավային Կովկասն էլ ավելի խոցելի է դարձնում արտաքին ցնցումների և ազդեցությունների նկատմամբ: Անորոշության այս բարձր մակարդակը նվազեցնում է Հարավային Կովկասի տարանցիկ և լոգիստիկ ներուժը՝ ազդելով Հայաստանի, Ադրբեջանի, Վրաստանի և նույնիսկ Թուրքիայի հաղորդակցության ուղիների նկատմամբ հավակնությունների վրա:

Հայաստանը վաղուց պատրաստ է Ադրբեջանի հետ խաղաղության համաձայնագրի ստորագրմանն ու վավերացմանը, ինչպես նաև Ադրբեջանի ու Թուրքիայի հետ սահմանների ամբողջական բացմանը: Եվրոպական խորհրդարանում վերջերս ունեցած իր ելույթում վարչապետ Փաշինյանը դարձյալ [ընդգծել](#) է դա:

Ադրբեջանն ու Թուրքիան կարող են վերջապես հրաժարվել [ձգձգումների իրենց քաղաքականությունից](#) և համաձայնել հարաբերությունների կարգավորմանը: Մարտի 12-ին Բաքվի գլոբալ 13-րդ ֆորումի շրջանակներում իր ելույթում նախագահ Ալիևը [ընդգծեց](#), որ

Ադրբեջանը հավատարիմ է խաղաղությանը՝ «ոչ թե պարզապես տևական, այլ մշտական»: Վերը հայտարարված մտադրությունների լավագույն ապացույցը կլինի Հայաստանի հետ խաղաղության համաձայնագրի ստորագրումն ու վավերացումը և բոլոր հաղորդակցությունների վերականգնումը: Հակառակ դեպքում Ադրբեջանը կարող է շարունակել [նախապայմաններ ներկայացնել](#)՝ ինչպես, օրինակ, Հայաստանի Սահմանադրության փոփոխությունների մասով՝ հետաձգելու կարգավորման գործընթացը:

### ... երբ խոսքը հաղորդակցության ուղիների մասին է

TRIPP նախագիծը կարող է բախվել նոր մարտահրավերների: Եթե իրանական վարչակարգը պահպանվի իր ներկայիս տեսքով, նրա ղեկավարությունն, ամենայն հավանականությամբ, հանդես կգա ավելի կտրուկ հակաամերիկյան դիրքերից և կարող է ցանկանալ խափանել ԱՄՆ-ի գլխավորած նախագիծը: Սա կվտանգի TRIPP-ի՝ որպես Ասիայի և Եվրոպայի միջև բեռնափոխադրումների միջնորդ հանդես գալու ներուժը՝ սահմանափակելով մեծ քանակությամբ կարևոր նշանակության օգտակար հանածոներ դեպի արևմտյան շուկաներ տեղափոխելու նրա հնարավորությունը, ինչպես նախատեսված է [«Տեստեսական համագործակցության մտադրությունների մասին համատեղ հայտարարության»](#) մեջ: Ներկայիս և ցանկացած հաջորդող հակամարտություն կարող է TRIPP-ը վերածել լոկ Ադրբեջանի, Նախիջևանի և Թուրքիայի միջև տեղական կապող ուղու՝ առանց իրականում իրագործելու այն միջազգային խաղաղությունն ու բարգավաճումը, որը խոստացված է նախագծի հենց անվանման մեջ:

Այսպիսով, TRIPP-ն այսօր կարելի է համարել ավելի կարևոր, քան նախկինում: Իրանը «մեկ գոտի, մեկ ճանապարհ» նախաձեռնության շրջանակում [տարանցիկ](#) կարևորագույն հանգույցներից մեկն է, որը հնարավորություն է ընձեռում Չինաստանից Եվրոպա ապրանքներ տեղափոխել: Իրանական մատակարարման ավելի փխրուն մեխանիզմը կարող է խթանել մատակարարման շղթայի հետագա դիվերսիֆիկացիան՝ ավելի գրավիչ դարձնելով Միջին միջանցքի (ներառյալ TRIPP-ը) շահագործումը: Բաքվի տեսանկյունից, Իրանի հետ Ադրբեջանի հարաբերություններում լարվածությունը կուժեղացնի TRIPP-ի արդիականությունը՝ առնվազն որպես Նախիջևանի և Թուրքիայի հետ կապող տարրի: Բաքուն, հնարավոր է, ավելի քիչ հակված լինի օգտագործել Արազի միջանցքը, որը Իրանի տարածքով կապում է Ադրբեջանի հիմնական մասը Նախիջևանի հետ:

Հյուսիս-Հարավ միջազգային տրանսպորտային միջանցքի (INSTC) հեռանկարները մնում են անորոշ: Դրա գործունեության շարունակականությունը կախված է նրանից, թե արդյոք իրանական պետությունը կմնա կայուն: Եթե պետությունը չփլուզվի, և իրանական մատակարարման ենթակառուցվածքը մնա անձեռնմխելի, միջանցքը կարող է շարունակել սպասարկել «Հյուսիս-Հարավ» առևտրային հոսքերը, թեև ԱՄՆ-ն կարող է ճնշում գործադրել Ադրբեջանի, Ղազախստանի և Թուրքմենստանի վրա՝ կանխելու իրենց տարածքների օգտագործումը: Այնուամենայնիվ, եթե պատերազմի արդյունքում Իրանի պետական ապարատն անգործունակ դառնա, ապա INSTC-ի իրականացումը, ներառյալ [գազատարը և էլեկտրացանցի նախագծերն Ադրբեջանի տարածքով](#), կդառնա ավելի բարդ խնդիր:

Պարսից ծոց-Սև ծով միջանցքը, որը նպատակ ունի ամրապնդել Իրանի կապը Եվրոպայի հետ Հայաստանի, Վրաստանի և Սև ծովի միջոցով, կբախվի լուրջ մարտահրավերների: ԱՄՆ-ն, ամենայն հավանականությամբ, կփորձի խաթարել այս միջանցքի գործարկումը՝ որպես իր հակաիրանական զսպման քաղաքականության մաս:

### Դեպի ո՞ր ենք գնում

Իրանական պատերազմը ևս մեկ անգամ ընդգծեց տարածաշրջանային և համաշխարհային աշխարհաքաղաքականության մեջ կայունության և կանխատեսելիության պակասը: Նմանատիպ ցնցումներին ավելի լավ պատրաստ լինելու և Հարավային Կովկասի դիմակայությունը բարձրացնելու համար տարածաշրջանի երկրները պետք է քայլեր ձեռնարկեն հարաբերությունների կարգավորման գործընթացն ու հաղորդակցությունների վերականգնումն առաջ մղելու ուղղությամբ: **Մասնավորապես, Հայաստանը, Ադրբեջանը և Վրաստանը պետք է խորհրդակցություններ սկսեն հնարավոր համատեղ գործողությունների շուրջ՝ մատակարարման շղթաների խափանման բացասական ազդեցությունը նվազեցնելու և փախստականների ներհոսքի դեպքում բեռի կիսման մեխանիզմներ ներդնելու համար:** Այս զարգացումները կարող են հիմք հանդիսանալ տարածաշրջանային ինքնության ձևավորման համար, ինչի պակասը Հարավային Կովկասն ունի Խորհրդային Միության փլուզումից ի վեր:



## ԱՊԸԻ Արմենիայի մասին

ԱՊԸԻ Արմենիան անկախ և անկուսակցական վերլուծական կենտրոն է, որի նպատակն է նպաստել տարածաշրջանային կայունությանը, կայուն զարգացմանն ու քաղաքացիական ներգրավվածությանը: Մեր առաքելությունն է փոխել Հայաստանի զարգացման հետազիծը առավել կայուն, ամուր և ժողովրդավար ապագայի ուղղությամբ:

Մեզ կարող եք հետևել [օնլայն](#), [LinkedIn](#)-ում և [Telegram](#)-ում: